

Вход 07.12.2024

Тропарь глас 4:

Днесь благоволения Божия предображение, / и человеков спасения проповедание, / в храме Божии ясно Дева является, / и Христа всем предвозвещает. / Той и мы велегласно возопийм:// радуйся смотрения Зиждителява исполнение.

Тропарь глас 4:

Правило веры и образ кротости, / воздержания учителя / яви ты стаду твоему / Яже вещей Истина. / Сего ради стяжал еси смирением высокая, / нищетою богатая, / отче священноначальниче Николае, / моли Христа Бога, // спасися душам нашим.

Тропарь глас 4:

Добродетельми, яко лучами солнечными, / просветила еси неверных мудрецы. / И, якоже пресветлая луна ходящим в ночи / неверия тьму отгнала еси, / и царицу уверила еси, / вкупе же и мучителя обличила еси, / Богозванная невесто блаженная Екатерино, / желанием востекла еси в Небесный чертог / к прекрасному Жениху Христу, / и от Него царским венцем венчалася еси: / Емуже, со Ангелы предстоящи, / за ны молися, // творящая пречестную память твою.

Тропарь глас 4:

Мученик Твой, Господи, Меркурий, / во страдании своем венец прият нетленный от Тебе, Бога нашего: / имея бо крепость Твою, / мучителей низложил, / сокрушил и демонов немощных дерзости. / Того молитвами // спаси души наша.

Кондак, глас 3:

В Мирех, святе, священнодействитель показался еси, / Христово бо, преподобне, Евангелие исполнив, / положил еси душу твою о людех твоих / и спасл еси неповинныя от смерти. / Сего ради освятился еси, // яко великий таинник Божия благодати.

Кондак, глас 2:

Лик честный Божественне мучениколюбцы, / воздвигните ныне, почитающе всемудрую Екатерину, / сия бо в тризнице Христа проповеда, // и змия попра, ритором разумы укротивши.

Слава

Кондак, глас 4:

Во бранех непобедимаго воина / и в бедах непостыдна заступника, / песньми Меркурия ублажим, славяще, // празднующая бо память его весело от бед избавляет и скорбей.

и ныне

Кондак, глас 4:

Пречистый храм Спасов, / многоценный чертог и Дева, / священное сокровище славы Божия, / днесь вводится в дом Господень, благодать совводящи, / Яже в Дусе Божественном, / Юже воспевают Ангели Божии:// Сия есть селение Небесное.

Прокимен, глас 3. Песнь Богородицы: Величит душа Моя Господа, / и возрадовася дух Мой о Бозе Спасе Моем.

Ин Прокимен, глас 4: Дивен Бог во святых Своих, Бог Израилев.

Причастен: Чашу спасения прииму, и имя Господне призову.

Ин Причастен: Радуйтесь, праведнии, о Господе, правым подобает похвала.